

# VATIRHI VA KHASITOMO VA TEKILE SWIDZIDZHARISI LESWI DURHAKA R12 MILIYONI EORTIA

**Pretoria, Ravunthlanu, ti 14 Khotavuxika 2019** – Vatirhi va Khasitomo vhiki leri va tekile swidzidziharisi leswi nga na nxavo lowu hlanganisiweke wa kwalomuya ka R12 miliyoni eka timhangu tinharhu to hambana eRivaleni ra Swihahampfhuka ra Misava Hinkwayo ra Oliver Tambo (ORTIA).

Hi Ravunharhu, ti 12 Khotavuxika 2019, Vatirhi va Khasitomo va khomile mukhandziyi wa xinuna loyi a ringeta ku ngungumerisa *heroin* yo tlula 3 kg leyi nga na nxavo lowu pimanyetiweke eka R9, 2 miliyoni, ku huma laha tikweni.

Mukhandziyi u yimisiwile no konanisiwa hi vatirhi va Khasitomo loko a ri ku khandziyeni ka xihahampfhuka xo ya eEurope. U komberiwile ku va heleketa endhawini leyi hlawuriweke laha a nga komberwa ku khiyinula tibeke ta yena leti a khandziyeke no ta na tona. Endhawini yo sechela eka yona, tibeke ta yena ti sikeniwile no sechiwa hi vukheta.

Xipano xa Khasitomo xi kumile swilo leswi a swi tumbetiwele etindhawini ta vuxisi eka tibeke, leswi kamberweke no kumeka ku ri *heroin*. U khomiwile hi swirho swa Vukorhokeri bya Maphorisa bya Afrika-Dzonga (CAS 106/06/2019).

Eka mhangu yin'wana, vatirhi va Khasitomo va yimisile nhundzu leyi fikeke eJohannesburg ku suka eLagos hi ti 13 Khotavuxika, ku landzela vuxokoxoko lebyi kumiweke ku suka eka yuniti ya Vunhlori bya Vugevenga ya Vukorhokeri bya Maphorisa bya Afrika-Dzonga (SAPS CI).

Endzhaku ka nkabelo, na hi ku pfuniwa hi timbyana to nuhetela, tiphakeji ta mune ti hlengeletiwile leti a ti ri na 4 kg ya *ephedrine (crystal meth)* leyi nga na nxavo wa le xitarateni wa R2, 2 miliyoni. Tiphakeji ti nyiketiwile eka swirho swa Vulawuri bya Mindzavisiso ya Vugevenga bya Xirhangana bya SAPS (Hawks).

Phasela ra *ephedrine* leri durhaka R630 000 ri kumekile eka Mail Centre ya ORTIA. Phasela leri a ti tika 2, 8 kg ri nyiketiwile eka Maphorisa ku lavisisiwa ku ya emahlweni.

SARS yi fikelerile ku humelela loku hi matshalatshala ya ntirhisano na yuniti ya Vunhlori bya Vugevenga ya SAPS.